

唐先生集序

奉議郎太府寺丞鄭總太玉

君子所貴於文者以與道俱而已詩以導志書
以導事春秋以導名分易以導陰陽此之謂道
易順而書險詩葩而春秋質書之全經不用也
字而詩復以韻以成章此之謂文文非道無以
立訓而垂世道非文無以示人而行遠堯舜禹
湯周孔孟氏皆明道立訓之文雖秦火洞然傳
之不絕其後楊雄韓柳之徒復著書能文柳雖



少時嗜進不擇所附以至於僨然能學道自勵
贖咎前非其文攻砭世盲有補教化故卒配韓
以傳若士之見道不明與雖明而無守文不主
道但求其工或道有不足其文僅能給用非沛
然有餘無以自立自著則雖聞於一時亦不傳
於後世然則文與道如耳有聰目有明血有氣
形有神要之不可斯須違離然後盡善此學者
所當知也眉山唐先生名庚字子西政和中謫
官嶺南予邂逅識之往來相好也其文實與道

俱觀其文則其爲人不論可知屬意遣辭必存
藥石之道或以箴世或以自明體高而妙詞嚴
以精或者以爲殆近短澁非也以予觀之正如
萬頃之瀾浩然東下崩騰曲折盡水之變終而
覆之纒數百言爾此其所以爲竒天人談妙於
元株四老奕棋于一橘可謂小乎其胸中如此
使攄之世則善然自謫而衰連蹇以至於死有
志之士所以哀之韓退之謂柳子厚斥不久窮
不極其文學詞意必不能自力以傳於後使子

厚得所賴為將相於一時以彼易此孰得孰失
必有能辨之者予西謫官七年詩文益多而工
其得失蓋類予厚余始疑近古以來文字有傳
皆須科名之崇爵位之顯或大人先生能輕重
人為世所信者稱之其勢足以相因而後傳如
子西則不待三者惟太學之士得其文甲乙相
傳愛而錄之愛之多而不勝錄也鬻書之家遂
丐其本而刊焉士方留意於時學萬音同律始
得為醇他文若不適用不足愛乃今不然嗟乎

文章果天下公器予西真豪傑之士太學誠賢
士之關哉子西與余俱喜詞章山川遠阻則寄
語酬唱尊酒會而則論文入微又同好出世間
法余嘗會謂子西金屑雖貴着眼成疾文章習
氣盍痛掃除雕琢肝腎徒勞人耳子西戲答曰
吾寧盡此生筆硯間寂然之樂俟來世尚未晚
也坐客嗑然而笑嗚呼行成于思業精于勤用
志不分乃凝于神子西文章博雅超詣神之神
機為是故也學者有意於傳則以先生為法宣

和四年五月一日序

第 度

予兄子西自髫鬣學爲文出言已驚人如賦明
妃曲題醉仙崖什上任德翁序之類時年方十
四五老師匠手見之無不褫魄落膽及入官以
來所著愈多至被謫南遷其文益工然隨作隨
散不復留稿故今所存者極少比見京師刊行
者止載嶺外所述者文多舛謬失真害理恐誤
學者觀省而不能以傳諸永久因併取其少年
時所爲文隨卷附之庶以廣其傳云昔昌黎文

公集其子壻李漢編而序之杜子美詩故相呂
公微仲為作年譜予於兄手足之愛親炙最久
其編次之意發揮之功庶或幾于二子焉若夫
予西文名播天下為搢紳之所歆慕至其撰著
有先後所造有淺深則覽者當自辨固不待余
言而後知也宣和四年六月望日序

溫陵呂 柴義 德脩

近世以文集顯于時者文忠公有六一居士集
舒公有臨川先生集參政呂公有觀文集丞相
張公有垂厓居士集蓋其文如是其官如是雖
樵夫野老市井庸人皆能道其姓字而樂誦之
故言之易以信而傳之易以廣其勢然也若乃
有其官而文不顯有其文而官不顯二者不可
兼故其傳之誠難若唐先生者所謂有其文而
官不顯者也先生名庚字子西眉州眉山人也

紹聖中以進士中第爲州縣官至大觀始入爲
博士士大夫稍道其文而世亦未盡知之政和
初謫居海表流離困苦蓋六年而不返身益窮
而文益富也其後歸京師僦居于景德寺余時
與先生比舍而日得見先生之所爲文頗多嘗
請其本以傳而先生辭曰予以是得名亦以是
得謗可一覽而足何必丐而去也於是果傳
焉退復私念曰先生之文金玉也雖閉藏埋沒
不求聞知然氣燄光彩久而必見于世蓋所謂

不待宮而後顯也已昔屈原以離騷顯陶潛以
歸去來辭顯盧仝以茶歌顯顧當時達官豈無
其人而三子獨得顯于世豈非以其文乎今先
生之文予知其不久而遂顯也先生死不一年
果有橐其文以來京師者而太學之士日傳千
百本而未已然惜其所傳者止此今始叙而藏
之庶幾它日必有得其完本者宣和四年八月
十五日序

眉山先生集目錄

第一卷

賦

征南賦

省愆賦

古體詩

內前行

長沙示甥郭聖俞

張曲江鐵像詩

目錄卷一



湖上

雙榕

大鞞行

蚤兒歌

蜜果

圓蛤

白小

瘡疾寄聖俞

示蚤

唐先生集卷之一

賦

征南賦

始攝提之孟冬余負罪而南馳雪盈尺而更繁風三日而猶吹體凍極而若無心怖甚而忘悲凡再信而至許覺驚塊之稍歸訪景福之遺基指空郊之荒漠曾禾黍之無有矧樂梁之丹雘國已揖於三馬臣不聞於一鷄豈

眉山唐庚子西著

當世之無儒抑此病之難藥道昆陽而流歎
澹悲風與愁雲階一夫之僭竊紛萬鬼之煩
冤嗟世祖之論功忘王章之曩言既直鉤之
不食終曲突之無恩過叔子之舊邦登峴山
而痛哭方關右之放賈蓋眼中之拔鏃獨何
心而表留卒養癰而潰肉儻遺靈之猶在當
舉白而相沃盡荆門之犖确瞰蜀江之湯湯
念故人之久別覺良晤之甘香稍回翔於澧
浦忽凌亂於瀟湘時廓寥而浩蕩復收斂而

淒涼味九歌之餘哀閔三閭之孤趣豈公子
之足怨實舉國而無與內不憚於女嬃外見
非於漁父持此道以奚歸亦各安於所處自
是遠矣行人漸稀水愈激而愈清山益削一作
刻而益竒造郴嶺之窮處云湟關之故基客
至此兮返顧鴈至此兮北飛眷武溪之毒淫
弔文淵之翼鏢射參狼於隴阪觀玷鳶於浪
泊奮身出於萬死騰口喧於百惡信老子之
足哀覺少游之差樂經韶易而再宿寫石上

卷之一
之遺聲悟醒神之在宥如天地之生成彼禽
魚固自有理而日月未嘗不明雖萬吹之不
同吾得一而皆正捨真易之短策放清遠之
孤舟覩碧落之靈秘嘲峽山之媚柔承懸崖
之滴乳攀裊岼之垂繆探羊城於浩茫發蒲
澗於深幽窮一時之詭觀渺萬古之清愁蓋
明年之正月始稅駕于羅浮

省愆賦

唐子謫居嶺表既已半載杜門時省愆而慨

曰身耶心耶孰陷吾於罪乎吾將求之身則
身非我有四大所會地水火風誰為之宰吾
將求之心則心不在內復不在外不在中間
是將安在晝夜以思寢食皆廢骨為之出髮
為之改夢有告余曰甚哉子之蔽也罪性本
空念念滅壞反復尋繹祇益咎悔道逢臭腐
何足矐矐玩味不已適足自穢淨是妄而沉
垢穀猶無而引稗譬之身體本自安泰或作
病想便若嬰瘵識此病之誰受尚何施於砭

艾譬之手足伸縮無碍忽作縛想舉動輒絀
悟此縛之無實即無繩而可解方聳聽于妙
語失胸中之結塊若春動而冰泮若秋至而
葉敗回視無始以來幾千萬世所作罪業悉
消散而崩潰矣豈獨今之所以流落顛沛者
哉覺而思之曰噫此殆維摩詰也攬衣而起
正冠束帶稽首西望作禮而退

古體詩

內前行

內前車馬撥不開文德殿下宣麻回紫微舍
人拜右相中使押赴文昌臺旄頭昨夜光照
牖是夕鋒芒如禿篋明朝化作甘雨來官家
喜得調元手右相視事明日始得雨上甚喜書商霖一尺字賜之周公
禮樂未制作致身姚宋亦不惡我聞二公拜
相年民間斗米三四錢

長沙示甥郭聖俞

我昔官關中子時趨長安相過日夜飲肯使
語笑乾但知醒復醉誰問甜與酸攬衣步中

庭仰首羨飛翰誓言早歸休慎勿貪高官時
未有添丁眼前惟木蘭舅甥一分背日月雙
跳丸那知十年外相見西江干拜起未寒溫
悲來各洸瀾我鬢已禿翁子頽非渥丹相從
海上去茲事人所難陂行白漊漊山宿青攢
攢人烟小歲後艸木深冬完昨日次長沙扁
舟掠湘灘中流遭惡風滿衣潑驚湍船如箕
尾點天作車輪團怖畏目敢側禱祈指頻彈
嚮非鬼神助幾作蛟龍餐忠信時可憑聖賢
豈吾謾勿畏嶠南熱我清物自寒勿憂海邦
陋心廣身亦寬磨刀斫鯨鱸隱几看鵬搏努
力近藥物明年理歸鞍得之兩瀉鵠龜筒不
須鑽

張曲江鐵像詩

像在韶州韶人相傳
明皇時所鑄云

開元太平久錯處非一拍就令乏賢人何至
相仙客直道既雕喪曲江遂踈斥汲黯困後
薪賈生罷前席金鑑東高閣鐵胎空數尺妙
處難形容英表良彷彿摩洋許國姿尚想立

朝色同時反棄置異代長嘆息

湖上

佳月明作哲好風聖之清湖邊得二友夜語
投三更煙露兩相濕水天參互明散衣芭蕉
涼曳杖枕榔輕星走拋餘光山空答虛聲歸
矣不可留過幽恐神驚

雙榕

水東雙榕間有叟時出遊清風衣履古白雪
鬚髯虬吟哦明月夕簸弄寒江秋驚傳里中

兒不泊岸下舟君看魑魅中有此風味否安
知非黃石但恨無畱侯此生鉏犁手誤入簪
紳流無功抵毫髮負罪平山丘政爾求澡濯
聞之嘆綢繆樞衣儻可親跪履安敢羞得聞
半偈語一解終身憂性不喜伐國兵書非所
求

大熟行

去年大雪埋尺筮水北荔枝遭凍死共嗔北
客帶寒來我欲分踈誰受理今年諸峒十分

卷之一
六二
孰東江不下龍川水南翁北客兩欣然孰與
恣饑食荔子

蚤兒歌

瀘南二子天一邊思之不見今三年阮咸已
老得遙集白髮自媿還欣然未看頭顱顱一作骨
弁頰頤啼中已有過秦篇諸田何得賤庶孽
會斬莊賈摧強燕

蜜果

臣聞失旦鷄已曉猶強鳴書生坐口窮抵死
輸丘誠嶺南貢蜜果海道趨彤庭黃蜂樂受
職紫鳳助揚舲忠勤雖云至思慮良未精由
來瘴癘鄉不識霜雪清土風不待講氣象昏
如醒秔稻秔稻熟水泉水泉腥而况莖果實
豈足奉聖明未論體性殊已覺面目生食之
儻有補勞者甘如於一作錫政恐無裨益所出
非和平上林寧少此下箸安可輕軒轅嘗百
毒上古雜神靈武王嗜鮑魚幾諫伏老成芻
蕘復何有葵藿但自傾

圓蛤

黃犢鳴水中相顧皆愕然探之無所得有蛙
僅如錢持問旁舍翁云此號圓蛤夏潦漲溝
渠喧呼自酬答卒然聞其聲謂當可專車既
見一拊掌寸莛量有餘物生元氣中大小各
異趣蛙質黃牛鳴持此欲誰附我居固已陋
爾名良亦村綿蠻嘽黃鸝我今思故園

白小

二年遵海濱開眼即浩渺謂當飽長鯨鯿口

但白小百尾不滿斤烹煮等芹蓼咀嚼何所
得鱗鬣空紛擾向來巨魚戲海面橫孤嶠險
喞噴飛沫白雨散晴曉終然不省錄從事此
微眇短長本相形南北無定表太山不為多
毫末夫豈少詞雄兩月讀理足三語妙人生
一漚潑誰作千歲調安能蹲會稽坐待暮年
釣

瘡疾寄示聖俞

體中初微溫末勢如湯鑊忽然毛髮起冷撼

如振鐸良久交戰罷項背如釋縛尚覺頭涔涔
涔眉額如鏡鑿空日一寒暑有準如契約伏
枕兩眸朔枵然如空橐平生十圍腹病起如
饑鶴衰鬢本無幾脫去如秋籜到今僅能步
出沒如尺蠖舊聞五嶺表有此萬戶瘡而我
自僑寓了不蒙闊略况子又持養如何亦例
着此身自空虛客疾安所托請作如是觀無
病亦無藥

示蚤

先君捐館年六十疇三算我今四十三始得
幼子蚤餘齡繼前人蚤也纔及冠况復未可
知積憂嘆祿養豈不欲茲事覺已緩但
愛眉目秀體質淨如盥顧瞻既精神懷抱亦
氣岸今者新剔髮瑩若珠未貫見之令人清
面擁疲手腕輒然撻吾鬢霜雪落几案豈唯
不肯嗔更付一笑槩骨肉今遠矣恃汝慰奔
鼠行當從諸兄誦書喧里閭而我於經術粗
能分句斷發蒙要師資心孔為開鑽許慎專

邊旁張華談史漢吾家儒業久捨此無別段
不應緣一噎便欲廢炊爨及親三釜足未用
萬戶鄭人生百年期我今特未半

夢泉并序

潮陽尉鄭太玉夢至泉側飲之甚甘明
自得之東山上作夢泉記示余命作詩

入道肯着相出神得佳泉起尋定中境謾意
山之巔四人蹋翫數里聞潺湲循聲到巉
絕滿意流甘鮮雖深石可數太察魚難筌分
為縞練去濺作珠璣圓一窺宿醒解三嚙沉

痾痊恍惚尚疑夢歡呼欲成顛山間短于井
海飲鹹生涎那知道在邇幾作野遺賢事故
由人興物為知己妍誰陪濠上游諒攜室中
天雖無十丈花中有一滴禪名酒覺殊勝耳
茶定常煎蘭亭羽觴冷魚腹青筒連新文來
遠矣開卷猶滾然徑欲抱琴去臨流聽未全
不但受目耳庶幾神者先寫為夢泉操第入
樂府篇將前輒復却萬事付有緣

夢詩數里聞潺湲
永叔醉翁亭記

四人蹋翫
退之記

鳴鵲行

簷間群鵲鳴相呼法當有客或遠書吾今何
處得書尺而况賓客乘軒車平生眼中抹泥
塗汎愛了不分賢愚卒為所賣罪滿軀放逐
南越烹蟾蜍百口寄食西南隅三年莫知安
穩無家書已自不可必更望故人雙鯉魚故
人頃來絕能踈况復萬嶺千江湖雞肋曾是
安拳餘至今畏客如於菟豈惟避謗謝還往
此日誰肯窺吾廬杜門却掃也不惡何但忘

客兼忘吾喧喧鳴鵲汝過矣曷不往噪權門
朱

採藥行贈梅蟠

順途行歌醉者誰先生採藥山中歸昨日携
籃入山去今日出山香滿路先生年來飯黃
精俗眼但白髮但青得失乘除適相補勿取
讒人界豺虎

鍾潭行

君不見惠州城之西永福古寺鍾岨竒夜輒

已去黎明歸萍沙模餽水淋漓山僧初驚久
恬嬉一夕徑去不返棲父老嗟惜僧垂涕明
年夏旱江水低此鍾居然水中坻奔走往視
空城陴挽以巨纜百牛回牛喘纜絕鍾不移
度不可得乃去之江花開落水東馳到今過
者猶俯窺刻舟記劒真自癡不應此物猶沙
泥

取水行

僕夫取水古龍塘水中木佛三肘長隨波俛

仰如簇糠並流拯之置道傍衲衣着帽僧伽
裝里人觀者如堵牆相與築室臨滄浪荷蓋
荃壁辛夷梁三日屋成小而香野草江花薦
芡芳爐煙晝清一作青夜燈光乃知實相與互
鄉人人性中普照王

採藤曲效王建體

魯人酒邨鄆園西河渡橋南越悲歲調紅藤
百萬計此貢一作無窮時去年採藤藤已乏
今年採藤藤轉竭入山十日脫身歸新藤出

上拳如蕨淇園取竹况有年越山采藤輸不
前今年輸藤指黃犢明年輸藤波及屋吾皇
養民如養兒鑿空爲此謀者誰

冬雷行

百蟲蟄處安如家阿香夜起推雷車一時技
癢不忍爬撼動尺蠖魚龍蛇龍蛇尺蠖踞已
久亦欲奮迅舒頑麻夢中一震忽驚躍發破
堊戶排泥沙泥沙已出雷遽止錯愕欲去難
藏遮蟲蛇狼狽莫知數間有伏龍吁可嗟

贈譚微之

去年絃歌程水濱甌中生塵范史雲今年講
學鵝城裏關西孔子楊伯起昔人論士觀心
期時人論士看目皮只知黃鷄矜嘴爪不識
騶虞避生草

游史君諸子歌

大游落落如長松說易妙合韋編翁胸中蘊
藉入眉宇筆下言語駟頭風小游濯濯如春
柳十八書生過秦手已將文舉呼大兒更與

長源為小友是家諸郎都幾人傳聞一一連
城珍未識龍川五袴手端是當年萬石君

北歸至廣州寄惠州故人陳伯修李

文輔梁昭德

歸心如躍馬奮迅不可駐別情如放猿已去
猶返顧三年孺子社數借柱史書好在五噫
孫善保千金軀舊來談天口老來盡地力萬
里不相忘寄聲問眠食

唐先生集卷之一

唐先生集目錄二

第二卷

近體詩

南遷

渡沔

武陵道中

長沙道中

鴨步

次泊頭

到羅浮始識秧馬

初到惠州

謝人送酒

水東感懷

登栖禪山

收景初書并示藥物

九日懷舍弟

收家書

贈何邦直

除夕

入日

栖禪暮歸

白鷺

六言二首

有所嘆二首

舍弟書約今秋到此

跋道德經

夜坐懷舍弟

送外甥之廣州

九日獨酌

始寒

復暄

送客至五羊二首

送故人秦州司理

寄潮易尉鄭太玉

次鄭太玉見寄韻

船居

喜雨

舍弟既到有作

收景初貶所書

次勾景山見寄韻

示舍弟端孺

寒食寄鄭潮

即事三首

遣興二首

送舍弟幹事廣州

目錄卷之二
春日謫居書事

寄任景初與舍弟

權舟遊西溪

有感示舍弟端孺外甥郭聖俞

遊悟性寺

舜祠

臘嶺戲書

長沙竹筍

唐先生集目錄卷之二

唐先生集卷之二

眉山唐 庚子西著

近體詩

南遷

去去寬鄉託此蹤
鬧中無地頓衰翁
未誅綺語猶輕典
更賜羅浮有底功
蝦菜賤時皆丙穴
茅柴美處即郛筒
着鞭要及春前到
趁賦梅花庾嶺東

渡沔

鶴歸遼海悲人世，猿入巴山叫月明。唯有沙蟲今好在，往來休並水邊行。

武陵道中

朝持漢使節，暮作楚囚奔。路入離騷國，江通欵乃村。垣墻知地濕，草木驗冬溫。寂寞桃源路，行人祇斷魂。

長沙道中

古古今今路，朝朝暮暮行。橘林香處飯，杉木翠邊程。山帶湘靈慘，川含楚夢清。江湖無限

句，遷客要才情。

鴨步

伏波江面瑩如磨，忽爾崩騰作滂渦。橫笛未終平似坂，此中端有萬蛟鼉。

次泊頭

何處不堪老浮山，傾蓋親潮田無惡。歲酒國有長春艸，木疑靈藥漁樵或異人。近前端有得丞相未宜嗔。

到羅浮始識秧馬

擬向明時受一廛着鞭嘗恐老農先行歲已
問吾家舉從此馳君四十年

初到惠州

盧橘楊梅乃爾甜肯容遷謫到眉尖因行採
藥非無得取足看山未害庶辯謗若爲家一
喙著書不值字三縑老師補處吾何敢政爲
宗風不敢謙

謝人送酒

世情不到海邊村載酒時來餉子雲便欲醉

中歲潦倒已將度外置紛紛細思擾擾膠膠
事政坐奇奇恠恠文喚取隣翁傳杓飲漸令
安習故將軍

水東感懷

往事孤峯在流年細草頻但知其室邇誰識
所存神碑壞詩無敵堂空德有鄰吾今稍奸
黠終日酒邊身

登栖禪山

海雨山煙撥不開眼前遮定一盡望鄉臺如

何借得維摩手斷取西南故國來

收景初書并示藥物

乾坤心腹友江海鬣毛斑
藥補他鄉闕書開
故國去一作頗何時乘下澤
此日仰高山會是
歸耕耦由來有賜環

九日懷舍弟

重陽陶令節單闕賈生年
秋色蒼梧外衰顏
紫菊前登高知地盡
引滿覺天旋去歲京城
雨茱萸對惠連

收家書

西州消息到南州
骨肉無他歲有秋
驥子解吟青玉案
木蘭堪戰黑山頭
即時旅思春冰拆
昨夜燈光黍穗抽
從此歸田應坐享
故山已為理菟裘

瀘人何邦直者為安溪把截將有功
不賞反得罪來惠州貧甚吾呼與
飲為作此詩

楚人季布以勇顯魯國
朱家用俠聞馳馬彎

弓臣好武吹毛洗垢吏深文王孫此日誰漂
毋卿子前時號冠軍滿飲一杯齊物論白衣

蒼狗聽浮雲

吾在惠州作酒二種其和者名養生主其稍勁者名齊物論後

禁主字遂去其主

除夕

患難思年改龍鍾惜歲徂關河先隴遠天地
小臣孤吾道憑温酒時情付擁爐南荒足妖
恠此日謾桃符

人日

人日傷心極天時觸目新殘梅詩興晚細草
夢魂春挑菜年年俗飛蓬處處身慕頤頰語
及彷彿見東津

栖禪暮歸書所見二絕

雨在時時黑春歸處處青山回失小寺湖盡
得孤亭

春著湖煙膩晴搖野水光草青仍過兩山紫
更斜陽

白鷺

說與門前白鷺羣也宜從此斷知聞諸公有
意除鈎黨甲乙推求恐到君

六言二首

幾年持鉢天外歲晚結菴海隅頭白親朋孔
墨眼生初識楊盧

煙合家煨老酒風腥船過鹹魚丁米獨遺遷
客峒夫不數僑居

有所嘆二首

林中宴坐老沙門豈願臨年觸垢氛正恐先

生不得飽欲令後死與斯文近逃台鼎居東
洛聞道衣冠滿北軍須信此塗天一握人間
謾說有孤雲

耕田佩印兩徒然憶相平津只去年恠底功
名稱地獄誰將官府到天仙是非已付漁樵
判疑信難憑黨與傳杯酌豈能通大道牀頭
當得酒如泉

舍弟書約今秋到此

此日方收信前時已具舟開頭今歲月軟脚

定中秋涼德為兄忝炎荒增爾憂從今西望
眼應到見時休

跋道德經

鬪智饒君三十里著書還我五千言只將得
一觀天下約法劉公已太繁

夜坐懷舍弟

無雲仍露坐有月更江臯沉陸傷吾道浮生
憶爾曹扁舟應夏口此夕數秋毫不見今三
載當時已二毛

送外甥之廣州

由也久從我牢之真有甥時情為容老秋色
汎船清撥刺朝朝味鈎輶處處聲越臺今弔
古旅魄向來驚

九日獨酌

登高無老伴引滿自高歌歡意天邊少重陽
野外多黃花空歲月白首尚關河它日龍山
興吾今在網羅

壬辰九月二十三日始寒以詩記之

朝來恠底冷前此已重陽漸逼袴襦節稍聞
灰火香煙嵐向冬淨橘柚得霜黃嶺表雖多
暑天時亦有常

十月復暄

誰會世間事即今冬後爍殘年仍御袂先日
已重裘地勢炎州令天時北客愁此生橐籥
內反復任吹咻

送客之五羊二首

不到番禺久繫雄良自如江山禹貢外城郭

漢兵餘圓折明珠浦旁行異域書五羊雖足
樂雙鯉未宜踈
建國今陳跡遊人合賦詩廢臺樛女後遺井
鮑姑時客去通星漢僧來度月支憑君黃木
口為致海神碑

送故人赴循州司理

溪入尉陀宮撐舟閣復通梅花吳驛外萍實
楚謠東方策他時執圜扉到日空天涯一杯
酒叙別意無窮

寄潮陽尉鄭太玉

又種羅浮一熟田江易未得返耕屨書來似
見眉間印別後新增髮上年下澤有車人誤
矣上林無報鴈徒然去歲引敢自陳無報越巫雞卜聞
之久爲問行藏若個邊

次鄭太玉見寄韻

度外歸期未要論故山石筍自高蹲它時名
譽牛心炙晚歲窮空犢鼻君有詩書并畫
絕我無德爵但年尊音塵不繼應相悉萬事

而今付默存

船居

憑誰舉此問瞿曇已築虛空作小菴維摩經
虛空作
室無有
定處不但燕閑充泛宅亦堪來往當浮騖
江湖有理吾將老魚鳥無心客自慚非復雲
安憂斗水牀頭垂手得清甘

壬辰九月不雨至巳年三月穡事去

矣今夕輒復霈然喜甚卧作此詩

老去生涯白木鏡脫逢艱食更何堪春深野

色憂年惡夜半簷聲覺雨酣睡外莫聽泥滑
滑想中已覩麥含含明朝竹徑添幽事玉板
堂頭作小參

笋有玉版
長老之號

舍第既到有作

武陵倉卒記他時我獨南翔子北飛覩過幾
多歸後事相看仍是別時衣匪躬老矣惟心
在便腹依然但髮稀尚有苦吟三十載與君
同飽蜀山薇

收景初貶所書

信斷常懷信斷憂得書還有得書愁未應宿
業都相侶揔為饒聲不肯休見說胸中卷雲
夢莫將皮裏貯陽焮而翁有道知興廢不患
無詞詣播州

次勾景山見寄韻

此生正坐不知天豈有狶苓解引年但覺轉
喉都是諱就令搖尾有誰憐腰金已付兒曹
佩心印還當我輩傳它日乘車來問道葦間
相顧共延緣

夜聞蚤戶叩船作長江礪欣然樂之
殊覺有起予之興因念涪上所作
招漁父詞非是更作此詩反之示
舍弟端孺
當年無柰氣狂何醉檄涪翁棄短策晚落炎
州磨歲月欲從諸蚤丐煙波與君共作長江
礪况我能為南海歌身世即今良可見不應
老子尚淒淒

北風累日不止寒甚寄潮陽鄭太玉

山前臘雪想紛紛風到南訛盡處村甕面不
容存酒子牀頭幾欲爨桐孫園林呼舞知衰
怯窓戶奔馳覺眩昏咫尺潮陽五袴國可能
分我一襦溫

即事三首

歸心急侶隴頭水華髮多于嶺上楸正是堯
朝猶落此當時湘浦亦宜哉
還家久近書難寫破屋陰晴榻屢移吾道非
耶來曠野人生樂爾復何時

案頭行掃塵隨起窓眼纔封雨又稍更力窮
空沽白餅莫將棄廢闢黃茅

遣興二首

僧寺借經便大字隣牆喚酒及新芻三年於
此得其理一飽已還非所求
酒經自得非多學詩律傷嚴近寡恩田里歌
呼無藉在朝廷議論有司存

送舍弟幹事廣州

欲罷媿決策擬行愁索居人心旱魃後旅色

颶風餘擊拆秋江夜開帆曉霧初它鄉仗神
力瀝膽奠扶胥

春日謫居書事

四十緇成素清明綠勝紅形容千慮後門館
一貧中白日時時別青蕪處處同此生唇舌
裡啼鳥暮春風

大觀四年春吾與友人任景初舍弟

端孺自蜀來京師至長安時方寒
食吾三人相與戎服遊九龍池飲

酒賦詩樂甚是歲吾遷嶺表明年
景初亦謫江表一作忽忽數歲皆
未得去寒食無幾念念悽然作詩
寄任因命舍弟同賦

居今行古任定祖底是遷延亦未歸我坐力
田傷地脉君緣搜句漏天機故都回首三寒
食新歲驚心兩濕衣學道一生凡幾化不因
到此始知非

乙未正月丁丑與舍弟棹小舟窮西

溪至愁絕處度不可進乃歸溪側
有兩榕甚奇清陰可庇數十榻水
東老人嘗飲其下云

楊梅溪上柳初黃荆竹岡頭日正長獨木小
舟輕似紙一尊促席穩於牀柎從坡去無人
識水出山來帶藥香應有居民解秦語為言
昭代好還鄉

有感示舍弟端孺并外甥郭聖俞

一出潼關五見梅愚忠幾欲伴黃埃弟兄手

足窮孤竹母子肝腸泣老萊好語忽從天上
落行人直向一作海邊回此生報國無它事
力穡供輸莫待催

遊廣州悟性寺寺有越王臺蓋尉陀
時築有井甘甚號達磨井云

崎嶇走上方浩蕩取秋光臺上經繆女江天
入夜郎華夷憑檻遠興廢引杯長泉脈來何
處中含定慧香

舜祠韶州

謳歌率土性之也號泣旻天孝矣乎何惜扁
舟繫韶石憶曾萬里叫蒼梧

臈嶺戲書

嶺多亂石
過者苦之

上世有鞭能走石今人無鐸可驅山一回憑
膝一移足老盡行人未老顏

長沙竹筍聞于天下大者可十斤重
食之甚甘而不冰脾昔渡湘欲作
詩未暇也今復過之酬呂此篇

地入長沙莫嘆卑竹萌徑尺舊相知九重纒

復金門籍萬里先叅玉板師契闊累年真負
口徘徊彌月未妨脾胃渭川風味那能對中有
離騷九辨詞

卷之二

十四

唐先生集卷之二



國家圖書館, NATIONAL CENTRAL LIBRARY, TAIWAN, R.O.C.

唐先生集目錄

第三卷

近體詩

五言雜詩二十首

閒居二首

調勾景山

遣興二首

甲午元日

春歸

春日五言二首

春日七言二首

鄭太玉送子魚

兒曹送窮

唁鄭二

驟雨

江漲

代書寄鄭二

八月十五夜月

有感

立冬後作

調端孺

東鄰二首

謾成

聞鄭二對吏五羊

東麓

西溪

野望

目錄卷三
二二
獨遊

醉眠

贈故游茂先子振

憫雨

贈博士承議

次張天覺見贈韻

遊處士臺

天覺和韻

江陵逢故人宋德祥

別處厚居正二宗兄

和天覺立春日示詩

宜都逢李六

舟中

北嵌

何執中挽詩

悼楊隱之承事

題覽勝閣後破佛

將赴闕有感示聃

目錄卷三
次韻強幼安冬日旅舍

次韻幼安留別

唐先生集目錄卷之三

唐先生集卷之三

近體五言雜詩二十首

其一

眉山唐 庚子西著

屏跡舍人巷灌園居士橋
花開不旋種草薶
復齊腰蛤哭明朝雨
雞鳴閣夜潮未能全獨
樂隣里去還邀

其二

已絕經年筆仍關
盡日門身謀嗟翠羽人事

嘆榕根蔬食風掀市樓居水破村嶺南霜日
薄何得鬢邊繁

其三

便歸良不惡未去亦隨緣戶口知無瘴謳歌
覺有年藤笈得句後桂酒抱愁邊經術吾衰
矣猶堪學力田

其四

不死良難學全生或可幾茶隨東客到藥附
廣船歸棋倦收成敗書慵卷是非關心無雜

慮魂夢入精微

其五

兀坐且如此出門安所之手香橙熟後髮脫
草枯時精力看書覺情懷舉盞知炎州無過
鴈二字在天涯

其六

飽食為茶地深耕覓酒材翻泥逢暗筍汲井
得飛梅湖盡船頭轉山窮屐齒回田間良自
苦清興亦悠哉

其七

壯歲日千里晚途天一方花綬聊傲世白袷亦隨鄉團扇侵時令方書遣晝長此間吾所樂便擬卜林塘

其八

白日消諸妄青山對屢空著書防惡客學圃問隣翁織貝流椀滑檳榔入頰紅丹砂落吾手秋至任飄蓬

其九

多事定何補寡言聊自溫蟹黃嗔止酒魚白勸加飡濯足樓船岸高歌抱朴村愧無驢可禦只益負君恩

其十

閭窄良難入間寬足見容竹根收白疊謂竹布也木杪得黃封謂椰酒也問學兼儒釋交游半士農行歌村落晚落日滿携筇

其十一

為農沙子步附保水西鄉隱几江天遠開門

佛土香時情荒徑草楚色淡一作魚梁欲縱
高秋日東偏短作牆

其十二

舊物盃中酒新銜海上翁百非無一是顯過
豈微功引水江分碧烹丹井為紅幽居亦多
事度日不全空

其十三

小市江分破連簿水捲翻到今佛跡在千古
鶴峯尊浮嶠來何處豐湖入數村登臨有何

好秋至數消魂

其十四

已分詩驅使寧辭酒過差南烹人釣給北信
客占鷗年事侵膚理憂端宿肺家嚮來功業
興到晚詠餘霞

其十五

覆載宜然等寒暄乃爾殊雪曾前歲有地過
此邦無煮海鯨鯢動烹山虎豹呼南來何所
得詩語帶媿媿

其十六

夜語不覺久晨興良獨難加之得卯酒晚矣
恰朝瓊筍蕨春生箸魚鰕海入盤南方禁太
飽茗碗直須寬

其十七

海氣東南上野烟申酉間草平連別洞雨轉
入他山道路魚鹽去樵蘇竹木還西江并北
客相對各蒼顏

其十八

水過漁村濕沙寬牧地平片雲明外暗斜日
雨邊晴山轉秋光曲川長暝色橫瘴鄉人自
樂耕釣各浮生

其十九

浪迹蒼梧外放懷黃木東人情雙鬢雪天色
屢頭風國計中宵切家書隔歲通為儒得愁
思一笑賴兒童

其二十

萬里非吾土三年失我常只愁鳶跼跼敢作

鶴昂昂白竹連閩越黃雲入夜郎何時返棲
息誰為問姚娘

閒居二首

未許幽人曉夢長朝朝親炷佛前香有詩為
愛素家渴無病緣抄陸氏方身雜蠶中誰是
我食除蜿外總隨鄉白沙翠竹門前路疑出
西郊向艸堂

細細敲門細細磨老翁方曲畫眠肱魚陂舊
種千頭膾桑徑新窠十畝繒菜足尚堪分地
主藥餘翻欲供隣僧平生雅有乘桴興咫尺
滄溟去未能

聞勾景山補蓋屋丞仍聞學道有得
以詩調之發萬里一笑

人言蓋屋侶江湖莫對丞莫嘆負餘別後耳
根無正始向來紙尾得黃初可憐鬼谷縱橫
口今讀神溪縹白書臣朔許長錢許少何當
天子念公車

遣興二首

南來不覺兩秋砧
覽照驚呼雪滿簪
平日不堪文館冷
暮年更賦武溪深
敢緣三巳有愠色
自笑一生能苦心
安得素絲隨里閭
鬪雞走狗任浮沉

八千岐路愁何補
四十光陰老亦宜
此去只堪犀首飲
向來都是虎頭癡
逢時有道其如命
得意無言所恨遲
詩債即今渾倚閣
新篇惟有莫相疑

甲午元日

非賢幸脫龍蛇歲
上聖應憐蟻蝨臣
憶與政和同度嶺
朝年已點四年春

春歸

東風定何物所至
輒蒼然小市花間
合孤城柳外圓禽
聲犯寒食江色帶
新年無計驅愁得
還推到酒邊

春日五言二首

啼禽通夢寐
芳艸過比隣
暖逼花期促
愁牽酒量伸

去就慙雲鴈浮沉羨海鷗
安心花片落豪氣
柳枝柔

春日七言二首

更與何人共寂寥
竹君時引到溪橋
是家大似東郭子
能使人之意也消
尚有小桃凌姹女
豈無太杓飲衰翁
老來不復談堅白
醉去猶能愛淺紅

鄭太玉送子魚

便當權閣太常齋
藥竈之傍手自煨
須信子

魚藏妙理生令蟹
毋媿凡才刀頭定向何時
得劍脊頻將好意
耒老去少陵雖病肺尚堪
持此薦寒醅

兒曹送窮以詩留之

世中貧富兩浮雲
已著居陶比在陳
就使真能去窮鬼
自量無以致錢神
柳車作別非吾意
竹馬論交只汝親
前此半癡今五十
欲將知命付何人

鄭二鎖試五羊父而不還問之廣人

云已失解從海道歸潮矣聞知惘

然信呂此詩

望君挹取哀然首為我迂回長者車璧玉已
聞歸間道足音那復念逃虛卑微官職緣親
屈眊驟情懷賴酒除政使登名侶韓子十年
曾不補遺餘退之復志賦哀白日之不與吾
謀兮至今十年其猶初豈不登
名于一科兮曾
不補其遺餘

驟雨

黑雲驚小市白雨沸秋江聲入家家樹涼傳

處處窓亂流鳴泱泱疊鼓鬧靡靡蘋末秋風
起斜陽觀海一作邦

江漲

秋來雨似澆雨罷水如潮市改依高岸津喧
救斷橋雲陰哭鳩婦池溢走魚苗天意良難
測前時旱欲焦

代書寄鄭二

別後定何似此中難具陳倦憎秋氣濕老怯
曉烟辛沸議今方爾歸期覺愈伸須煩三絕

手時復餉清新

八月十五夜月

應緣人望望故作出遲遲幾歲一相見浮雲
寧別時唵拚雞膈膊玩覺兔迷離此夕登樓
興非關有所思

夜久睡覺不復能寐凄然有感故作
無復更殘曙夜深清欲饑葉飛魂夢數露重
語音知月色到秋苦更聲臨曉遲平生憎墨
翟老去亦悲絲

立冬後作

啗蔗入佳境冬來幽興長瘴鄉得好語昨夜
有飛霜籬下重陽在醅中小至香西隣蕉向
熟時效一梳黃

端孺糴米龍川得粳糯數十斛以歸
作詩調之

倒拔孤舟入瘴煙歸來百斛瀉豐年炊香未
數神江白糴滑釀偏宜佛跡泉飽去定知頻
夢與醉中何至便妨禪憑君爲此長安米看

直公車牘幾千

東隣二首

即今樂事屬墻東
歲晚何曾酒盞空
白蜜已輸仍節近
紅藤未動况年豐

肯聽寒梅緩緩消
笛聲夜夜到溪橋
恠生不似關山月
新向城中得徵招

漫成

雲暗便窓破
山寒賴屋低
往還天外少
早晏雨中迷
書冊開仍闔
履聲東復西
何嘗有所

賦得句旋安題

聞鄭二對吏五羊

舊友年來略散亡
新收鄭子亦遑遑
歲云暮矣無雙鴈
我所思兮在五羊
獄吏事權先自貴
書生蹤跡况能狂
風流人物今餘幾
可忍羣兒復謗傷

東麓

經旬不見小匡廬
忽爾相逢喜欲呼
自入秋來更韶潤
卻從瘦裏帶敷腴
人間信有傷心

碧坐上那無滿眼沽可是清暉解娛客能令
腸斷到愚儒

西溪

西溪霜後更沉涵溪上愁人雪半簪市散爭
歸橋納納櫓搖不進水潭潭利傾小海魚鹽
集味入他村酒茗甘百里源流千里勢惠江
城下有江南

野望

賴有澄江在專供倚杖清水裁偏岸直雲霍
亂山平鞞鼓知農隙雞豚覺歲成却緣搖落
候木杪得孤城

獨遊

是日遊予獨幽情知者誰時光新舊歲節物
淺深枝鴉攬春祠敏鳶窺野燒癡田園有妙
理吾悔得之遲

醉眠

山靜似太古日長如小年餘花猶可醉好鳥
不妨禪世味門長掩時光篔已便夢中頻得

句拈筆又忘筌

故游茂先大夫元佑初為唐安守豪
逸喜賓客能劇飲談笑蓋陳孟公
之流也今唐安絃索之盛甲于兩
蜀自游使君始後累遷至秦鳳憲
以卒既二十餘年而其子振旅遊
嶠南相過于惠州乃作此詩以贈
之

唐安千指錄琵琶故事猶聞蜀叟誇罇酒何
人陪北海練裙今日見西華子歸未得頻芳
草我老無成學種瓜萬里相逢俱白首班荆
長語夕陽斜

憫雨

老楚能令畏壘豐此身翻累越人窮至今無
柰曾孫稼幾度虛占少女風茲事會湏星有
好他時曾厭雨其濛山中賴有菜糧足不向
諸侯託寓公

贈博士承議

無盡

南歸遷客氣平和
磊落胷中所得多
白日過從惟綠醕
清宵夢想適維摩
徘徊未忍捐鷄肋
寂寞猶能顧雀羅
好與鄉人敦薄俗
莫因哺啜負岷峨

次張天覺見贈韻

別公歸去養天和
見說清朝士已多
裾捨登門何處曳
頂緣受記昔曾摩
幾時傳說重調鼎
去歲成湯已解羅
會引鑑湖為故事
要從英主乞三峨

重陽後一日從無盡泛舟游處士臺
故詩人秦龜從所居

阜河經雨水微沙
船貼臺根日未斜
三徑就荒悲白士
一尊相屬對黃花
已將遠眺收平楚
更遣清言到永嘉
要見仙翁頭似漆
請看醉後落烏紗

和韻

無盡

東湖水落露堤沙
舟過湖心藻荇斜
野徑小橋穿竹巷
煙村踈柳間蘆花
新秔炊熟臘脂

白活鯽珍于丙穴嘉飲散肩輿乘皓月燭籠
何用兩行紗

江陵逢故人宋德粹自播守罷歸南

陽以詩見貽依韻和酬

昔別方初節相逢各素秋君歸卧龍國我脫
墮鳶州霜髮含多事塵容帶倦遊行藏端可
見歲晚莫登樓

走城西別處厚居正二宗兄會居正

出獨共處厚笑語終日頗有卜隣

之興因屬買田江陵作此詩

舊交零落半存亡歲晚荊州得兩唐臨別眼
中無小謝再來天外有他楊預行後日誅茆
地要近先生避世牆會與幽人數晨夕何能
結客少年場

和觀文相公立春日示詩

閑把流年指上輪朝來七十五迴春一盃願
薦喬松壽四海方依社稷臣血氣未嫌辛菜
冷顏容猶稱綵幡新清詩小字傳觀處滿座

驚呼覺有神

生還至宜都逢李六

更把餘年着酒澆莫談前事費燈挑地緣有
語封還止印為無功鑄復銷賴是詩書能却
瘴到今魂夢亦聞潮頭西歸去君休恠尾段
無多不柰焦

舟中

去楚及梅落過夔逢麥秋既非就國者判作
賈胡留心力盤灘盡年光拋渡適移書故山

友慎勿厭粗糲

北嵌

雙鬢莖莖白孤舟寸寸移北嵌方守霽南畝
定何時無處謀春酌他村博晚炊頻年卧江
海寧卹一灘遲

何執中挽詞

白壁就黃壤忘情良獨難觀生六十化比沒
九遷官筆下無時俗曾中有歲寒雅懷嗟不
遂欲挂死前冠

王元隱挽詩

雙鬢緇經老千金食客貧由來戶外屨不救
甌中塵惜此凌雲手終于入幕賓何人禪家
學崔篆得崔駟

悼楊隱之承事

忍能揮淚讀封碑平昔修為我自知一日不
齊無此理五行並下記他時肯教靈運先成
佛未信王家敢譽兒耆舊即今零落盡鶴歸
空漠冢纍纍

題覽勝閣後破佛

塵侵面相黃金暗雨入眉毛白玉休此日爭
看大垂手遊人誰復小低頭

將赴闕有感示聃

老畏高門地慵便下澤車終然嬰世網難作
愛吾廬白首趨行在青袍奉起居平生誇好
手到此不如疏

次韻強幼安冬日旅舍

殘歲無多日此身猶旅人客情安枕少天氣

舉盃頻桂玉黃金盡風埃白髮新異鄉梅信
遠誰寄一枝春

次韻幼安留別

白頭重踏軟紅塵獨立鵷行覺異倫往事已
空誰叙舊好詩乍見且嘗新細思寂寂門羅
雀猶勝纍纍塚卧麟力請宮祠知意否漸謀
歸老錦江濱

唐先生集卷之三

唐先生集目錄

第四卷

惜梅賦 并序

平臺賦 并序

歸歎賦 并序

陌上桑曲

白頭吟

結客少年場

五雜組二首

公無渡河

明妃曲

舞馬行并序

風樹吟

戲題醉仙崖

古生

走筆贈仙姑

醉後怒筆

雲南老人行

憶昔行

午起行

張求

擊劍歌

黎城酒

題崔令曲海後

晝寢效魯直

城上怨

別勾永叔

春日雜言二首

覽鏡

客至

寄題張志行醉峯亭

聞東坡貶惠州

寄郭潛夫

病鶴行

唐先生集目錄卷之四

唐先生集卷之四

眉山唐 庚 子西著

賦

惜梅賦 并序

閩中縣庭有梅株甚大正當庭中
出入者患之有勸予以伐去者爲
作惜梅賦

縣庭有梅株焉吾不知植于何時蔭一畝其
踈踈香數里其披披侵小雪而更繁得隴月

而益竒然生不得其地俗物溷其幽姿前晉
史之紛拏後囚繫之嚶呻雖物性之自適揆
人意而非宜既不得薦嘉賓于商鼎效微勞
于魏師又不得託孤根于竹間遂野性于水
涯悵驛使之未逢驚羌笛之頻吹恐飄零之
易及雖清絕而安施客猶以爲妨賢也而諷
余弓伐之嗟夫吾聞幽蘭之美瑞乃以當戶
而見夷茲昔人之所短顧仁者之不爲吾迂
數步之行而假以一席之地對寒艷而把酒

嗅清香而賦詩可也

平臺賦并序

平臺梁王劉武作也班史稱平臺
唐杜甫稱吹臺世以謝惠連嘗爲
雪賦則又謂之雪臺也舊說在大
梁城東北如淳晉灼云在大梁城
東二十里今在城東南蓋漢距今
且千歲城郭凡幾變則聞見之異
宜哉作平臺賦

予與客遊汴都之東南登梁王之平臺顧艸
木之搖落懷古人以裴回客慨然嘆曰吾聞
祖龍失劍楚竊其柄漢鑿其孤矯枉過正齊
楚趙魏燕韓之郊荆楊兗豫青徐之境蟠城
千里星散碁布原田溝澮不知其幾千萬頃
瓜分幅裂以王一姓於是擅爵人而赦死罪
戴黃屋而私蹕警鼓銅破山煮海絕流侈極
奢窮然未有梁山之親倖者也井畢煌煌實
沉之彊北界泰山西抵高陽帝子出閭有燁

其光金錢布幣子女玉帛錦繡寶器車馳轂
擊輓轡繹繹挽來于梁爾乃羽翼鄒枚腹心
勝詭郊關之固三百餘里萬甍鱗鱗樓閣橫
斜擬于未央之邃也峭築峨峨蔽景于霄擬
于漸臺之峻也淨影潭潭日星泳涵擬于太
液之深也麋鹿咿咿禽珍獸奇擬于上林之
多也旌旗纛旆前騎後乘擬于五柞之遊也
鷲擊盧馳躡景追飛擬于長楊之獵也千金
一壘斷瓊鏤瑰擬于武庫之藏也游談之士

濡毫緩頰曳長裾而從之擬于公車金馬之
待詔也夫侈極則疑勢偏則離弱幹強枝安
能久而不危也邪予曰噫子知其一而未覩
其二也勝廣之亂毒於管蔡呂霍之變危於
吳楚三馬之偏痛於燕秦王謂聖之既深於
齊趙子曷不較其輕重哉周室東遷晉鄭焉
依朱虛叱咤祿產殲夷五葉之後宗國陵遲
洗垢求癥吹毛索疵翦刈肘股棄絕藩籬墮
犬牙之形勢壞磐石之宏基故長沙舉袂而
不得逞中山感音而涕洟濟南之墟梓柱生
枝以饑廢食卒死於饑可不悲哉客憮然爲
間曰然子言得之

歸歟賦

歸歟先生歸歟先生坐講六籍立譚百氏突
姬孔之室與剗軻雄之心髓游說天子閉關
千里射策萬言捍闔亂理葩吐竒霞散綺拔
犀渠擢象齒曾不能八事爲律片言寤旨偃
倭一命摧折委靡窮駢驥于捕鼠困于將于

補屨血鵬而肉鯨兮尚不能逞刀杙之殘濕
兮又何足舐昔薛丞相置東閣以觀士朱游
拂衣而起奚扁舟之不汎豈洞庭之無水先
生笑曰嗚呼噫嘻予言小哉病者嗜于土炭
餓者甘于糠粃醉者安於遇虎怒者恬于染
指萬法非實皆由心起狐尾見於疑目牛鬪
聞于病耳宿瘤何惡顰眉何美狐裘何榮牛
衣何耻吾謂戴安道破琴而不肯作未若宋
之遜秉笏而唱吟閣立本沮氣於畫師未若

彌正平遺形於鼓史抱關擊柝兮亦悠悠彈
冠結髮兮亦悠悠吾忘形於彼此者也

陌上桑曲

趙文羅敷採桑陌上趙王
見而悅之置酒逸馬羅敷
拒之作陌上
桑見古樂府

蕭疎陌上桑寂寞採桑女蠶老葉轉稀羅敷
淚如雨歛袂處雙蛾秦箏一曲歌殷勤謝郎
意其如義命何

白頭吟

秋風團扇情夜雨長門意高鳥既已逝前魚

當自棄賤妾白頭吟知君懷異心祇知茂陵
女不憶臨邛琴

結客少年場

結客少年場男兒意氣須激昂朝從魯朱家
暮過秦武陽飲酒邯鄲市膝上橫秋霜明年
從軍入燉煌金印紫綬輝路傍貧中知己慎
勿忘

五雜組二首

五雜組水中魚去復還天上鳧不得已轅下

駒

五雜組各利地去復還塵埃轡不得已貧而
仕

公無渡河

公無渡河公無渡河君不見吳兒秋悲小海
唱湘女夜怨招菟訶抱石沉清流弄酒奔素
蛾忠血醉蛟蜃義肉飽鼃鼃暗中水弩貫七
札魚龍百恠垂涎澤吻牙相磨公無渡河公
無渡河平地猶恐生風波

明妃曲

生男禁多才長沙伴湘縈生女禁太美陰山
嫁胡兒長沙雖歸如不歸陰山亦復歸無期
絳灌通侯延壽死琵琶休怨漢天子

舞馬行并序

明皇時教坊舞馬百匹謂之某家
嬌其曲謂之傾杯樂天寶之亂此
馬流落人間魏博田承嗣得之初
不識也已而承嗣大燕軍中酒行

樂作馬聞樂聲起舞承嗣以爲妖
命殺馬予讀其說而悲之遂作舞
馬行

天寶舞馬四百蹄綵牀觀步不點泥梨園一
曲傾杯樂驤首頓足音節齊幾年流落人間
世挽鹽駕鼓不敢嘶忽然技癢不自禁俗眼
驚顧身顛躋後生何嘗識此舞謂之不祥固
其所

風樹吟并序

子路有言樹欲靜而風不止子欲
養而親不在子三復而悲之故作
風樹吟以終其意

樹欲靜兮風不止子欲養兮親不俟歸飛返
哺八九子我曾不如畢逋尾樹欲靜兮風不
休子欲養兮親不留且自梅兮且至棘當年
飼我如鷓鴣

戲題醉仙崖

誰家翠嶺 亭亭白崖隱起仙人形仙人昔

嘗爲酒星乘興痛飲乾北溟五湖一吸聊解
醒江妃喪魄鼇失靈上帝震怒呵出庭醜然
影落秋山青行人幾見霜葉零醉仙醉去不
復醒何須荷鍾隨劉伶河沙劫壞歸冥冥

古生

卷地風來怒濤起驚散沙汀雙翡翠誰將仙
匹鎖金籠孤飛吟叫煙波裏古生開鑠放珍
禽春江日暖重相尋巧舌相和葦風軟綺翼
交飛菰浪深壯哉古生真任俠意氣肝腸何

激烈功成不復更偷生一劍揮霜襟濺血世
間美事多參商白馬青梅人斷腸古生理沒
在何處江山流水空茫茫

走筆贈仙姑

仙姑八十春秋高兩鬢墨黑無斑毛鹿胎冠
子青紗袍神風清峻真仙曹人生瞥忽如銷
膏是非海裏翻波濤五斗官米令人勞安能
俛首爭錐刀願仙乞我瓢裏一丸藥武陵溪
上掃世俗腥與臊不然教我蟬蛻羽化之

一二海山深處摘取王母千歲不熟之蟠桃

醉後怒筆

灰寒火冷燈微明虛簷瀉雨如瓶傾酒酣耳
熱身體輕撫膺大吼黃鍾聲怒目直視如流
星拔劍擊柱傍人驚丈夫寧可五鼎烹安得
容此吞舟鯨

雲南老人行

雲南老人老無力藜杖支腰隴頭立道逢蜀
客話平生時復仰天長太息自言貫屬瀘水

涓瀘水邊徼濱獠夷夷人之性類蛇豕頻肆
毒螫為瘡痍十五年前多寇盜一境騷然不
相保民禾收刈虜人家戎馬偷嚙汶江草近
來風俗都變移卷却旌旗張酒旗牛羊村落
晚晴處煙火樓臺日暮時兩眼昏花兩鬢雪
喜見昇平好時節茆屋橫吹一笛風野店携
歸半瓶月問翁致此何因緣道是江陽太守
賢鼓琴絃歌不生事十年靜治安吾邊鄭國
僑去已久誰信人間準前有異日刊為德

政碑請問雲南攏頭叟

憶昔行

憶昔東方來亭傳荒荆棘風庭紅葉乾雨砌
蒼苔濕饑虎撥門開哀禽向人泣十載却西
還亭傳已完葺青鎖揖江山朱欄趨階級行
旅糧不費大路遺敢拾蜀道無難易人心自
寬急寄言守亭者勿使狐狸入

午起行

細藤簾展波紋綠瓦枕竹牀殊不俗白日寨

寥午眠熟起來更覺精神足萬緣寂靜數甌
茶千偈消磨棋一局此間真味有餘清未羨
紛紛厭梁肉

張求

張求一老兵著帽如破斗賣卜益昌市性命
寄杯酒騎馬好人事金錢投甕牖一語不假
借意自用減否鷄肋巧安拳未省怕嗔毆坐
此益寒酸餓理將入口未死且強項那暇顧
炙手士節欠凋喪舐痔甜不嘔求豈知道者

議論無所苟吾寧從之遊聊以激衰朽

擊劍歌

三尺光芒耀霜雪長安使氣爲任俠閑對要
離壯淚垂醉叱荆軻怒噴裂天下承平猛士
閑夜半無人自彈鋏會須東海斬長蛟歸來
倒瀝腥臊血

黎城酒

黎城酒貴如金汁解盡寒衣纔一吸獄曹叅
軍到骨窮簿書吻燥何由濕夜來細雨落簷

花對客惟有嘗春茶明朝踏月趁早衙免使
路中途麪車

題崔令曲海後

崔令飲酒五七斗崔令唱辭一千首時時浪
飲輒高譌名韁利鎖摠無有人稱崔令為顛
狂我知崔令非顛狂承流宣化有餘力高歌
浪醉也何妨

晝寢效魯直

雨餘熱喘殊喊呀坐翻故紙腰足麻鋪陳枕

簟寒青紗倒牀不復知橫斜夢魂飛揚遠還
家故人見我一咲諱須臾睡覺衙鼓搗牆頭
暝雀聲槎槎

城上怨

雨作懸河風似箭風號雨馳寒刮面何處巡
城老健兒城上謳吟自哀怨不知底事偏苦
傷聲高聲低哀思長戍邊役重畏酷法去國
年多思故鄉城上譌時夜方半正是孤齋醉
魂斷和風和雨兩三聲推枕投衾坐長嘆傳

聞點虜動熙河戰士連年不解戈今夜風號
雨馳處城上哀怨知幾何

別勾永叔

巴江灑灑巴山空十里五里蕉花紅少年銳
意立功業破煙一棹輕如風却思三歲相懽
聚說劍論詩輕李杜平生不作兒女悲今日
為君重回顧李白好擊劍
僕辭亦如此

春日雜言二首

官居雙海棠何年植庭中風流二月間照耀

一室紅渾家惜此花具飲呼乃翁翁雖怯杯
觴意難逆兒童臍醺十分深白眼一飲空醉
時忘華顛浩歌滿東風
庭前楊柳枝春來蔚然綠老翁鬢邊青已去
不可復舉杯屬春風此理竟如何轉首飛揚
花春風自蹉跎

覽鏡

昔我先君子德與形氣俱褒衣佩長劍軒昂
真丈夫我生困多難乃類山澤癯頭目類麀

鼠愧忝虎豹駒太倉五斗米足養蕞爾軀誰
能向天子號饑訴侏儒

客至

山頭竹萬箇風來玉相戛下有屋數間蕭然
如佛刹門無車馬喧幽徑芳艸茁隔窓識君
聲遽起投筆劄黃雞未啄黍環堵無可殺園
蔬煮澹泊山泉啜甘滑何以樂嘉賓春禽日
嘲啗

寄題張志行醉峯亭

先生飽醞籍表裏皆純粹獨推糟與粕施之
為政事百里飲其德陶陶有懽意餘醺落嘉
陵一江醇酒味沉酣倒山骨頽然卧蒼翠亭
中時把酒坐對青山醉醉鄉在何許祇此中
間是先生况多文為續一作讀醉鄉記

聞東坡貶惠州

元氣脫形數運回天地內東坡未離人豈比
元氣大天地不能容伸舒輒有礙低頭不能
仰閉口焉敢效東坡坦率老局促應難柰何

當與道俱逍遙天地外

寄郭潛夫

我昔遊瀘江泛舟奔楚宮黔江自南來胥會
涪之東黔江清且碧瀘江濁而紅紅碧不相
入分流如卧虹羣瀦激湍濤洶湧成戰攻湏
臾盡變濁混混顏色同清固不勝濁此理天
下通君視開成間牛李爭長雄要之贊皇子
不勝太牢公物理自古然徘徊嘆無窮

病鶴行

鶴兮鶴兮何處來秋江靜兮蘆花開波浪浸
月白皚皚千聲萬聲鳴哀哀不飛不翔不飲
啄骨脊稜稜瘦如削冰姿玉質僅生存雪羽
霜毛半零落鶴兮鶴兮何鬱鬱我知爾是冲
天物芝田就養孤高情瑤池洗出神仙骨傳
聞仙島冥冥中水晶甃作蓬萊宮祥煙瑞霧
常濛濛好將六翮搏仙風

唐先生集卷之四



國家圖書館, NATIONAL CENTRAL LIBRARY, TAIWAN, R.O.C.



唐先生集目錄

第五卷

古體詩

寄郭虞卿

題溫泉觀

題洪川驛

食筍行

題史廷直郊居

撥花

送王觀復交代

戲贈王推官誠中

送趙元思司法

送扈大夫端叟

到任後寄家兄

送鄉人下第歸鄉

送趙安道下第歸鄉

代先狀寄孫熙叔

郡人獻筍守以分餉羣寮而吏獨見

遺守知之命追賜馬蓋不出既久

而人忘之也因成一篇

友人還鄉有感

哀賢

讀邸報

訊囚

程使君生辰歌

唐先生集目錄卷之五

唐先生集卷之五

古體詩

寄郭虞卿

讀書老益苦瀟洒比元澹直行不由徑慎獨
肯欺闇如何已鴻冥猶復見蟬撼寡和郢中
曲忍辱漁陽摻斗筭彼常態義命吾何憾屈
伸固有時佳境當徐啗

題溫泉觀

眉山唐 庚子西著

溫泉宮裏行人宿溫泉池上行人浴人自多情
情感盛衰泉固無人任榮辱細路蟠蟠入踈
竹萬年秦山一作萬里晴川皆在目吾皇高拱九重
深一作不若一抹松蘿為誰綠

題洪川驛

倦遊征人鬢欲絲膏車秣馬東南馳出門四
顧迷路岐閉戶却坐愁支頤魚生釜龜鼠窠
枝夏畦千里成陂池吾皇致治方無為淫雨
破塊天何如勸君飲酒君勿疑行使止尼良

由時未逝形數皆有涯此獨未信無窮期

食筍行

半夜春山試雷雨驚起蟄龍初出土野人不
惜蒼苔古掘得佳殮自燒煮滿盤明玉遠飄
風一箸鱸魚味差苦竹齋食罷竹陰午竹裏
行唵傲簪組君誇食肉君固卑我誇食筍我
亦癡阿蠻豐臆飛燕瘦意態雖異要皆竒君
不見天隨先生貧食杞又不見關中客鄉肥
刺齒豐儉不齊皆有理彼此相忘聊爾耳

題史廷直郊居

黃[■]搏手盡郊居掩清晝山容涼肺腑竹意
淨懷袖入門編簡香無復更銅臭君看道南
阮豈識元德秀

梭花

斫破夜叉頭取出仙人掌鮫人滿腹珠鮎魚
出新網

送王觀復交代

文正活國手頗恨見不及宦遊識其孫想像

高冠岌岌豈但為交承自是賢友執尤喜譚性
命微到鬼神泣吾曹飲蒼海百川資一吸失
脚沙土間卷舌甜泥汁相依既云久臨別百
憂集去去自護持雨荷終不濕

戲贈王推官誠中

乃祖賦渾成津涯極深遠家學到諸郎文字
復清婉今作劾鼠吏于理誠未穩怒草三千
犢馳驛奏龍袞上問今安在幕職補閤苑召
賜數刻對嘆惜相見晚總未置青瑣亦應校

黃本九萬里扶搖忽然馳峻坂

送趙元思司法

誰不從王事夙夜獨匪懈休沐猶坐曹伏日
不歸廨平生熟大法餘事止小楷自稱霹靂
手作縣真癘疥董宣雖強項臨事中實駭從
君學吏禮稍稍識起拜今當告別去何以贈
行邁二十罰自親此理須少戒

送扈大夫端叟

平生未識韓不願封萬戶方幸得依劉未幾

公已去三年此留滯一味惟忠恕江水倒隨
人劔嶺橫遮路那知黃門手就寫碧蘇賦空
聞隴上兒擊塊歌五袴

到任後寄家兄

君子所就三為食最為下起家仰寸祿此實
下焉者南山無敞廬千里就官舍但使食有
魚敢言曹乏馬同僚皆故人每事相假借况
復官長賢醉歸應不罵

送鄉人下第歸鄉

閉門誦書史已讀萬卷破養氣塞天地不受
一毫挫名聲落空廓蹤跡長坎壈塵埃相避
迨齒髮嗟老大文章心未死功業手猶唾世
事若循環天理猶轉磨朝得暮或失俯吊仰
輒賀行見風雲會驚起南陽卧

送趙安道下第歸鄉

大官危小官卑君不得官君勿悲君不見前
日宰相今海涯胡椒八百斛流落知為誰又
不見州縣官折腰事細兒常憂一語不中治
敢對西山笏柱頤大官危小官卑君不得官
君勿悲願君酒量如鷓夷勿作瓶罌居井眉
與君賭取醉為期明日烏帽風披披

代先狀寄孫熙叔

疇昔告行邁卮酒月中把蹭蹬我已歸徘徊
君尚且相逢忽驚恠已覺都幻假但當呼阿
素預遣置若下略聽誦靈光未擬賦換馬一
醉洗塵埃萬事真土苴

郡人獻筍守以分餉羣僚而吏獨見

遺守知之命追賜焉蓋不出久而
人忘之也因成一篇

坐穩膝生踝凝塵罩藍版出少頰面生未熟
城市眼爭席人相忘饋肉禮非簡本自無光
彩不必更埋鏹自知吾免矣置酒具瓶盞起
舞屬細君相對一笑筦

友人還鄉有感

饑鳥啞啞枝上啼秋風蕭蕭吹客衣儒冠悞
身不得歸女凝妻寒兒病饑歸來聚首貧亦

好我固知之師不十束書十載遊長安一官
遠謝醫卜賢托生長饒真可憐君今別我還
故里相見親朋問所以爲言顛顛京塵裏

哀賢

仁廟乃文考裕陵真武王先帝幾於成主上
賢於康時亦有二子採藥登首陽其一猶行
詩其一今云亡功在百世外懦夫心膽張齊
景但多馬名滅身未殭

讀邸報

當今求多聞取士到蓬華時時得新語誰謂
山縣僻昨日拜御史今日除諫官立朝無負
漢恩厚論事不妨晁錯安臺省諸公登衮衮
閉門熟睡黃紬穩

訊囚

叅軍坐廳事據案嚼齒牙引囚到庭下囚口
爭喧譁叅軍氣益振聲厲語更切自古官中
財一一民膏血為吏掌管鑰反竊以自私人
不汝誰何如摘項下髭事老惡自彰證佐日

月明推窮見毛脉那可口舌爭有囚奮然出
請與叅軍辨叅軍心如眼有睫不自見叅軍
在場屋薄薄有聲穢只今作叅軍幾時得騫
騰無功食國祿去竊能幾何上官乃容隱曾
不加譴呵囚今信有罪叅軍宜揣分等是為
貧計何苦獨相困叅軍噤無語反顧吏卒羞
包裹琴與書明日吾歸休

程使君生日歌

使君來分銅虎符哺養百姓如哺雛設弧在

旦人奔走舉首爭為使君壽但願使君如乃
翁福德種種皆圓融官至大中年九十諸郎
鳴玉左右立

唐先生集卷之五

唐先生集目錄

第六卷

古體詩

寄杜蓬州

中秋遇雨感懷呈世澤彥直

通判蘇君俞見和復次韻答之

喜雨呈趙世澤

蓬州杜使君洪道屢稱我於諸公聞
之媿甚為詩謝之

嘲陸羽鴻漸

代內作

荅

戊子大水二首

除鳳州教授非所欲也作詩自寬

登越王樓

以下綿州舊作

芙蓉溪歌

富樂山

將家遊治平院

蓋老杜所謂東津者也

遊天池院

遊雪峯院書所見院在開元寺之西

越王樓之東蓋小院也

十月十八日與舍弟登越王樓便道趨

開元寺上天池得句滿紙顛倒雜亂

幾不可讀明日詮次成二十二韻

六一堂并叙

蘇時中惠茶

天馬歌贈朱廷玉

受代日呈譚勉翁謝與權

目錄卷之二
與舍弟飲二首

受代還眉

赴闕

劍州道中見桃李盛開而梅花猶有存者

武興謠

會飲尉廳效八仙體

古風贈謝與權行三首

程義父挽詩

唐先生集目錄卷之六

唐先生集卷之六

眉山唐 庚 子西著

古體詩

寄杜蓬州

閨中勝事不妨奇舊來僻左人誰知
祗緣迺祖斷腸句名與江水東南馳
閨人德之不敢忘遺祠今在南山上
壁間貌得太瘦生想是當時苦吟樣
寄將模本博新詩為我落筆揮珠璣
君家自是個中脚會道春從沙際歸

中秋遇雨感懷呈世澤彥直

初遊東都年二十清懽趁得中秋及高陽會
中酒徒集惠和坊裏繡鞍入蟹螯嘗新左手
執雞頭未老按玉粒盃行到手不待揖明月
清風供一吸纏頭不惜傾箱給倚賴決科如
俯拾誰知得官反拘繫此景此歡那復緝今
歲中秋雨如江窮山牢落秋光濕孤燈熒熒
照書笈屈指流年如箭急

通判蘇君俞見和復次韻荅之

公才過人真能十萬藝即今誰敢及萬卷收
藏富編集詩人闔域稱優入西州書生學穿
執邇來東遊為祿粒十分折腰敢長揖欲吐
壯懷還自吸勿從調笑鬪捷給狂言偶發難
收拾語意徘徊諧韻牽繫不敢獻公公密緝報
章大是鮫人泣一一珠璣落圓濕自慚恩竭
如空笈口吻悲嗟殊窘急

喜雨呈趙世澤

去年雨多憂水潦今年雨少憂枯槁都緣縣

政失中和水旱年年勤父老前時雲起雨欲
落夜半風來還一掃明朝引首望雲漢屋上
晨暎仍杲杲賦輸百萬未破白簿脚何緣得
勾倒上書自劾欲歸去老婦挽衣傍奪藁扳
窮往訴北山神是夕沛然償所禱稻畦穰種
勢已活竹裏蕭疎聲更好故應神意憫孤拙
苟免歲中書下考便安杵臼伺秋成雲子滿
田行可擣

蓬州杜使君洪道屢稱我于諸公聞

之媿甚為詩謝之

去天一尺古蓬州年來除守得勝流渠家本

是城南杜詩律賢我三千籌

禮記投壺某如賢於某若干

此才高却解事入眼人才皆可意它邑猶分
刺史天片言每為將軍地故應憐我退無田
力相推挽令向前傍人聞說皆撫掌竹竿那
使鮎魚緣

嘲陸羽

陸子作茶經竟為茶所困其中無所主復著

毀茶論簡賢傲長者彼自愚不遜茶好固自
若於我有何恨便當脫野服洗盞爲一獻飲
罷挈茶去譬彼澆畦畹君看禰正平意氣真
能健達與不達人何啻相千萬

代內作

爺娘嫁我時本以君能文謂當得所託致身
到青雲觀今天下事勝負方紛紜英俊肩相
摩料理不到君何妨採藥去相與登鹿門著
書示後世千載猶清芬

答

世豈無高人刻意在枯槁竟為恩愛累有志
莫能保君能嘆我歸衰髮及未葆向非有此
翁那得有此媪著書豈吾能庶幾獲幽討何
必登鹿門是山皆可老

那得有此媪下舊本使德權事非是

戊子大水二首

踏歌喧喧雜銃鼓潭邊呼龍令作雨龍嗔揮
水十丈餘千村萬落幾為魚寄謝龍神且安
處熟睡深潭不驚汝

夜半傳呼河入室攬衣床深沒下膝舊來水
不到譙門老巫歸咎西門君西門君去老巫
舞明年却娶河伯婦

除鳳州教授非所欲也作詩自寬

人生纔食頃何處分好弱刑獄即道場篋庫
有真樂故紙終日翻毛錐幾年閣百函無力
致諸公誰說著今承學校之頗訝名字錯宿
業豈無戀得冶不敢躍骨肉遠難俱囊裝貧
易縛師儒要好手七人良非脚憂盡識羨空

抽窮知爾薄後生端可畏人材若爲作豈唯
朝孝先便恐困有若行路固知難得地幸不
惡柳拖千丈絲山集五色雀絳紗諒無有首
菴聊可爵况聞荳積嶺中有不死藥

登越王樓已下綿州舊作

左綿城北長安道馬足翻翻人自老越王高
樓藏道邊道上行人迷不到樓前西

一作日落

隨江紅一見如逢隣舍翁年老何處識面目
應在少陵詩句中

芙蓉溪歌

人間八月秋霜嚴芙蓉溪上春酣酣二南變
後魯叟筆七國戰處鄒軻談人間二月春光
好溪上芙蓉迹如掃周家盛處伯夷枯漢室
隆時賈生老小兒造化誰能窮幾回枯枿還
芳叢只應人老不復少有酒且發衰顏紅

富樂山

富樂之名誰所留建安年中劉豫州擁兵入
蜀萬貔貅辱章送國來迎頭軍中醜酒椎千

牛炙如巴山酒如涪酒酣握手登高丘極目
紫芋蹲春疇富樂之名此其由君聞此說還
信否當時兵起四十秋拆屋不足供誅求生
靈嗷嗷鼎中油山中胡爲乃爾優想今富樂
萬倍劉端能容我逃窮愁山僧笑言客罷休

將家遊治平院

蓋老杜所謂
東津者也

年來官職如水樣只有登臨作酬賞好山一
一如佳客令人欲作傾家釀昨日西樓吊王
孫今日東津悲逐臣江邊勝事畧尋徧不見

海樓高入雲

遊天池院

上方細路蟠如綰下有晴川平侶坂近水遠
山皆可人踴躍來供搜句眼小池中有江湖
春孤洲便可呼白蘋團團倚檻看清徹不敢
洗耳山僧嗔

遊雪峯院書所見院在開元寺之西

越王樓之東蓋小院也

東家亦崢嶸西隣有稜層那知齊魯間有此

叢爾滕路僻少人到掣鈴小童磨松扉迫窄
入石磴欹危登迎門老虎吠畫壁蒼龍騰庭
除淨如拭几席不受蠅清焚日日香明續年
年燈土盆養幽花古木纏枯藤雖小亦自足
無虧豈須增憶昨苦盛夏數來避煩蒸每借
安禪榻曲此晝眠肱日月當幾何霜雪遂嚴
凝慈竹猶踈踈惡風遂朋朋作詩書屋壁掃
滅聽寺僧

十月十八日與舍弟登越王樓便道

趨開元寺上天池得句滿紙顛倒
錯亂幾不可讀明日詮次成二十

二韻

沐浴罷趨局幽居愁杜門重登帝子樓共吊
詩人寃凭欄參井天隱几西南坤冬深一水
瘦歲晚千山髡豐稔徧川陸太平到雞豚江
城水頽雉市瓦塵迷鴛坐對仙雲宮祗隔斜
陽村樓臺白水外松栢蒼雲屯天垂望羗山
雪汁融朝暎誰為四方步招此千歲魂便道

訪古寺策杖尋靈源上到山椒窮轉覺天池
尊行疲犬馬力下視烏爲翻不應水性高疑
有神物噴肯隨秋漲落况逐夏潦渾潛通八
角井散入千家盆漁村喚欲罄釣石諒猶温
似聞叩舷歌相見持竿蹲吾曹本山林朝衣
裹得猿只應適野車便作忘憂萱詩魚巧拙
對酒雜醇醪吞閣吏况解事不妨盡餘樽

六一堂并序

綿州司戶廨舍舊為推官廳歐陽

文忠公生於此近歲陵井譚望勉
翁為參軍葺一室於廳事之東扁
號曰六一堂予見而嘉之為賦此
篇

我思六一翁羽化四十年雖不及握衣每願
為執鞭手彈醉翁操目覩廬陵編牀頭五代
史屏間七交篇詩常諷思穎曲每歌歸田齋
摹畫舫樣酒法冰堂傳此志自弱冠到今已
華顛嗟予又晚輩讀書慕先賢即彼生處所

館之與周旋時對文章姿稍息簿領肩賢者
果不死瞻之猶在前似揮誅奸筆猶勞擊佛
拳誰當嗣前規時為易蠹椽勿毀魯恭宅中
有夫子天

蘇時中惠茶

三年泮宮苦幽獨中有宜人唯睡足蟲魚注
罷直廬靜午枕鳴雷撼窓屋故人蘇子半幅
書餉我閩溪一包玉親題更屈調絃手遠寄
來澆飯蔬腹我應疑我夢得官誰信吾衰已

無復空令半夜忍饑吟
搜到池塘春草綠

天馬歌贈朱廷玉

貳師城中天馬駒
眼光掣電汗流珠
將軍出塞萬里餘
得此龍種來執徐
朝踏幽燕暮荆吳
歷塊一蹙傍人呼
向來價重千金壺
一朝不直半束芻
千馬萬馬肥如猪

受代有日呈譚勉翁謝與權

老來忽忽流年緊
三見涪江秋葉隕
祇緣二子日相從
便覺一瓢愁可忍
東津曉作招隱

賦西樓暮得思歸引
文字能令酒盞寬
江山未放詩才窘
分題踴躍誰避席
得句歡呼同彼隼
泉名三逸本戲語
野史千年傳不泯
醉歸半路飛蝙蝠
餘興中宵伴蚯蚓
那知詩鬢秃于筆
但見兒童長如筍
留滯甘爲西域胡
衰遲更結東遊鞞
故山咫尺未成歸
坐使蒼顏厚如脰

與舍弟飲二首

篇篇皆有酒世疑淵明詩佳處正在此俗子

卷之六
十一
那得知寄迹杯酒中序者為之辭詩酒吾家
事何用寄跡為疑者既已陋序者良亦卑酒
殊醉味同勿問醇與醜

濕酒澆枯腸戢戢生小詩詩中何等語酒後
那復知黃菊遂行適徑去不復辭拒霜猶屈
強其勢何能為但問酒有無勿計官高卑江
邊捕魚郎教我當啜醜

受代還眉

久客念吾土每嘆江山非及茲受代去亦復

無家歸仕宦幾半世奔走遍九圍竟無置錫
土安此容膝扉還當僦屋居况有囊金揮處
鄉亦何有去國空依依

赴闕

十年冷首著夢寐長闌干繼粟自不飽朝糞
豈辭酸雖無汗馬勞幾作蠹魚乾自知爬沙
手未辨扶搖搏此行敢僥倖政爾求便安恐
或得所欲聖主天地寬

劍州道中見桃李盛開而梅花猶有

存者

桃花能紅李能白春深何處無顏色不應尚
有一枝梅可是東君苦留客向來開處當嚴
冬白者未白紅未紅即今已是丈人行肯與
年少爭春風

武興謠

去年山中無黍稷只有都根并橡實都根作
麩如食蜜橡實炊飯如剥栗東家有錢食橡
實西家無錢惟食都今年都盡橡實貴山中

人作寒蟬枯

會飲尉廳效八仙體

尉公不忝東州英坐上拍滿樽中盈令尹學
道眼目明作佛肯後靈運成戶椽句法令人
驚登壇抗臂從我盟法曹靜如不能鳴胸中
自有百萬兵會稽少年富才情墨竹中含楚
辭聲泮宮老人駕虛名賦詩飲酒畏後生

古風贈謝與權行三首

錦橐碌碌竒經笥便便腹幾擬問天公如何

飲不足鳴鷄變好音璞石琢良玉為報採詩
人文翁能化蜀

我有無絃琴無絃亦無徽忘言乃能解得意
心自知山高流水深尚咲鍾子期為君奏此
曲改調作別離

生逢堯舜君四門方穆穆賢俊日登庸不聞
澗阿獨願君攄賢業邦方有道穀毋縮袖間
手軒車遠行復

程義父挽詩

門戶金張貴規摹鄒魯儒平生冰玉姿不受
紈綺紆肯顧博餅印甘為小兒呼舊來便劇
邑下車成袴襦暮年賦從軍隻箸安邊隅不
識墓中人永懷屋上烏

唐先生集卷之六



國家圖書館, NATIONAL CENTRAL LIBRARY, TAIWAN, R.O.C.

唐先生集目錄

第七卷

近體詩

譚勉翁詩章老夫所畏而以能問於不能此殊不可曉也媿而作詩

既以前韻贈勉翁復懷廷玉因次韻
峽路十韻

清明日示弟姪

赴益昌六言二章

上益昌守李大夫

上漕使

石漕生日

翟提倉生日

家提倉生日

錢憲生日

張嘉父生日

送宋衮臣赴任浙憲

送趙世澤供奉

遊仙雲宮

直舍書懷二首

書鄭撫幹詩卷後

哀詞二章

籌筆鋪

獲蠻賊代主簿賀張安撫

書齋即事

題所居

夜坐感懷

述懷

秋夕書懷

過湖縣

過田橫墓二首

過潼關

題瀘川縣樓

六言

蘇君俞通判愚齋二首

題春歸亭

和程大夫荔枝

雪意二首

閨怨

俞和叔座上賦白鹿

寓精道齋有感懷家山二首

晚春寄友人二首

春日雜興七首

張祖同挽詞

任太君挽詞

送太學李先生歸鄉

送蘇教授赴闕

別閩中許秀才許歸闕

送朱元素歸養

贈瀘倅丘明善二首

調華陽尉

天寧節口號

書新堂

自笑二絕

除夕感懷

金牛驛二絕

春日郊外

嘉陵江上作

自笑

率諸公飲開元寺勉翁有詩因次其

韻州上綿

直舍夜坐

上張安撫

春日

任滿未聞除代

次勉翁送客韻

唐先生集目錄卷之七

唐先生集卷之七

眉山唐庚子西著

近體詩

譚勉翁詩章老夫所畏而以能問於不能此殊不可曉也媿而作詩

高才乃爾信虛名句法時來就考評投社得君真惡客專門知我有先生文章已逼三都賦行輩猶推四海兄細看劉侯詩自好不應便服老彌明

既以前韻贈勉翁復懷廷玉因次韻
千金駿骨買虛名驥老通衢價未評
逐去定知窮不死向來元以句爲生
東風又見一作鶯朋友北信難憑
鴈弟兄欲寄此懷惟有月
天涯分與故人明

峽路十韻

上馬復下馬羸軀不暫停
鈴聲今古道柳色短長亭
亂石波翻雪洪崖岫破青
羊歸沿絕壁鹿飲入寒汀
兩岸渾遮月中天畧見星雲

來通玉壘江去背滄溟
春少花難折霜多葉易零
愛山猶着物畏棧未忘形
事業知安在艱危已備經
宦遊方此始何日遂鴻冥

清明日示弟姪

歲華忽忽又清明憶與諸生試集英
金鎖掣雷開右掖紵纒褸披雪照昇平
立班雉尾身疑夢茂對龍顏目乍驚
百拜起居分左右十年胸臆轉縱橫
愧無長策裨千慮敢昧初心苟一名
三道豈能窺董傳乙科今復愧匡衡始

吾進取恬無意看汝光華便是榮它日當求
田二頃杖藜自足過浮生

赴益昌六言二首

豈有登臺袞袞謾令去國遲遲南越纓方欲
請北山文莫相移

樂職如含酒美判司敢嘆官卑會待薛疏供
帳歸從朱老栽檜

上益昌守李大夫

標致自清流知名二十秋諸儒堂上席羣容

帳前籌南渡衣拖繡西來幕建油食恣逢屈

突封戶識荊州襦袴三巴國鞬橐九郡侯

寧武軍節制諸郡道與期變魯文盛擬從周

矢雖關聽賓壺不廢投

本府訟牒至冗處之有餘地未妨

登袞袞暫屈布優優望府多奇士華顛媿督

郵客愁移帶眼鄉思詠刀頭崎嶇緣底事樵

悴此重遊舉目江山是翻身歲月適技癢論

文在心闌觸事休那堪趨冉冉祗是判悠悠

揣分宜長隱憂貧復少留長裾何處曳門館

儻容鄒

上漕使

持節三千里提封一十州天文占使入地上
覺錢流吏有言前信農無賦外求事投餘刃
畢政舉大綱休惠澤坤維潤威風井絡秋利
源乾復溢民瘼痼還瘳德以柔剛濟材兼巨
細收道興期變魯文盛擬從周即給中臺筆
行弛外部籌孤生真自幸微祿每容偷未可
長聞去須為寸進謀祗應清白眼能為辨薰

蔣

石漕生日

夢斷維熊夜祥呈饋鯉初固應賢有後誰謂
慶無餘為國家相似憂民子不如符分四任
虎金佩十年魚未補三公衮聊分八使車權
衡公選格陵阜富軍儲閱閱瓊猶在朝廷席
正虛稱觴勤祝頌二十考中書

翟提倉生日

奎畢夜騰輝英靈出帝畿陶門八翼俊郤桂

一枝魏使斧今持鉞經編舊絕帝政將儒雅
飾學造道心微士論宜金馬君恩且繡衣德
純渾可飲才俊不容晞盛世方連茹孤生耻
食薇初從漆雕仕全拙漢陰機齋舌猶餘苦
尊心未得歸大椿祈不老烏鵲正求依

家提倉生日

銅梁蟠地角此日誕英竒世路方欹側心田
自坦夷著書楊子宅講學仲舒帷庠序聲名
久朝廷議論推受鑿才賜對攬轡便逢時誰
道儒官冷如今使節持幸全陳孺社喜遇紫
芝眉更祝靈椿壽驚鳥託隱枝

錢憲生日

何處產英竒河南定鼎基珠傾鮫室寶蘭長
謝庭枝事業堪臺省功名暫海沂案成張說
口德滿紫芝眉和氣真堪掬清風凜欲吹每
因憐傳癖未任責書痴盛德雖忘報私心實
自知遐齡何以祝華表鶴歸時

張嘉父生日

靈光不自截今日誕忠良揮塵雲騰踊我冠
鶴瘦長疆明心似月勤幹鬢成霜赤縣鳴琴
宓清朝攬轡滂權衡公調選陵阜富饒糧除
惡雖云切憂民只恐傷行看星使動已覺省
蘭香壽考何須祝傳家辟穀方

送宋衮臣赴任浙憲

絲衣入蜀記當年金紫重来抱使權擁鉞止
姦民奠枕揚鞭畫計地流錢汝南評論常相
借圯上文書獨見傳政目告成纔五月歲頭
未改恰三遷秦雲慘雪趨朝路吳雨肥梅按
部天名位愈隆人愈遠從今帝席爲誰前

送趙世澤供奉

君豈蹶張手是閒聊自藏兒童歌楚些婢子
誦靈光契分詩交密形骸酒遣忘方依益者
友遽理舍人裝雞黍它年約君常約余山河
白日長陽關那忍聽衰老易悲傷

遊仙雲宮

出郭三竿日橫江一葦航雀飛田有麥蠶罷

野無桑下馬危梯滑開門古殿香雨餘丹井
溢苔入醮壇荒盡老星辰動碑殘歲月亡鐘
聲落城市符祝走村鄉埜鳥啼巴蜀山崖刻
漢唐臨歸更回首惜此一襟涼

直舍書懷二首

寸枉非吾志休論尺與尋黃披終日卷青對
十年衿風眩藥囊減雨昏茶椀深揚雄名宦
思都向草玄沉

箇處本來冷此時仍更清擁爐成久坐曳杖
卻徐行暝色侵書帙秋陰入鼓聲悠然索馬
去祇此是功程

書鄭撫幹詩卷後

本合金閨去翻來玉壘遊邊塵凝不動時價
索相酌自得清新庾非關鍛鍊周雲臺家格
體文館祖風流冀北離蒙顧遼東祇自羞好
傳江上女歌向竹枝秋

哀詞二章

雲霄才業逝川東學易年齡一夢中春殿昔

抽蟾桂綠夜臺今隕幕蓮紅殘章斷稿塵埃
滿別院踈簾笑語空千古龜山原口墓暝煙
蕭索白楊風

文章泮水動英遊玉殿騰名十四秋蓮幕未
平臺省志薤歌潛引古原愁青雲意氣千金
薄綠綬綵編一命休科第不窮餘訓在鳳毛
森秀紹箕裘

籌筆鋪

骨寡欺孤罪未訶先生此意竟蹉跎謾令鄴

下癡兒女駭汗驚惶欲渡河

獲蠻賊代主簿賀張安撫

詔書頻促馬頭東更爲邊民縛狡童三箭不
煩仁貴手七擒自得武侯功梟雛已去古巢
冷狼子不歸秋穴空何用聲名達朝聽恐妨
辟穀伴喬松

書齋即事

書生不事事書齋春晝長竹色語笑綠松風
意思涼簞歌樂仁義圖史披興亡此間有佳

趣此外皆茫茫

題所居

鼾睡失青春昏昏尚欠伸素知行路惡敢厭
在家貧搜句工雖淡看書味頗真檄來端不
喜毛義已無親

夜坐感懷

聲斷鐘樓月文書對坐時破窓燈焰走凍硯
筆鋒遲名利髮將鶴風霜手欲龜何當一簑
雨披曉翦蓴絲

述懷

名字雖云繫列曹儒風門戶只蕭騷頭顱自
揣宜藏拙指目何妨笑養高本以食貧來仰
祿豈於王事更辭勞老來精力堪驚嘆一紙
文書輒數遭

秋夕書懷

疊疊歲華侵垂垂老境臨時光自風雨寒色
到衾衾萬竅號秋杪孤燈照夜深蛩聲亦清
苦唧唧伴人吟

過湖縣

狼虎猶如父子仁
人生安有不親親
武王况是聰明主
却恨初無一諫臣

過田橫墓二首

成則為王敗則亡
英雄成敗本尋常
滄溟無際何妨死
却死東郊未耿光
九江梁楚竟誅夷
自古才高必見疑
脫使酈生猶未死
將軍來此亦何爲

過潼關

鐵衣十萬擁胡雛
手釋襟喉計亦疎
關外不聞天子詔
將軍未甚讀兵書

題瀘川縣樓六言

百斤黃魚鱠
玉萬戶赤酒燒
霞榆甘渡口
容艇荔枝林下人家

蘇君俞通判愚齋二首

人間爭以智相高
底事紛紛祇自勞
頓覺宋愚真有味
莫將佳處語兒曹

三年消遣琴書在
一室清虛杖屨涼
卻恠齋

名渾未盡過來愚智已兼忘

題春歸亭

沙際春光又早歸亭前景物故應奇綠楊雅
與清江稱殘雪偏於碧嶂宜流水無憑何處
去東風有準不吾欺芳菲欄檻無窮興消得
新愁入鬢絲

和程大夫荔枝

家在岷峨飽荔枝十年遊宦但神馳側生流
論今千載左思蜀都賦入貢稱珍彼一時定

自不將凡果比

曹子建云龍眼凡果非荔枝比如何偏與瘴

煙宜白頭莫作江

南客辜負山中故友期荔枝

巴成吾髮白猶作江南未歸客坡云

雪意二首

睡眠拭朦朧開門雪正濃客來迷舊徑虎過
識新蹤浦遠渾無鶴林疎只有松惜琴如不
解酒興若為供

榆關書不至雪又滿平蕪指冷頓呵玉骨寒
屢掩酥綠嘗冬至酒紅擁夜深爐塞上風沙

惡征人到也無

閨怨

芳草遶池綠天涯人未歸春來更消瘦渾欲
不勝衣

俞和叔座上賦白鹿

洞中於世本無求取白鹿一落人間幾見秋和
月看時迷濯濯隔雲聽處認呦呦未容鷦客
矜風韻應許猿翁作品流莫把竒毛驚俗眼
恐妨歸去舊山幽

寓精道齋有感懷家山二首

論兵作賦兩匆匆人事光陰轉首空一作
夜夢飛山色裏一年秋在雨聲中揚州騎白
非無意上蔡牽黃信此窮幸有林泉未歸去
欲將清興問征鴻

悠悠功業老堪憐舊事憑誰可共論直欲酒
中賒快樂尚能花裏覓寒溫詩書誤我成何
事歲月侵人不見痕汾水年年秋鴈到庾郎
何處不銷魂

晚春寄友人二首

眼底春愁惱殺儂揚州往事旋成空風流只
合稱狂客衰颯何堪作病翁水國春深梅子
雨江天日暮鯉魚風何時執手同尊酒收拾
清歡笑語中

滿眼蕪菁斷送春多情饒病兩關身只知老
去人心改不覺愁來酒盞頻霜鷓空拳知有
命漠魚磔水恐傷神丈夫出處端無據猶欲
辭家再入秦

春日雜興七首

羲陽瀟灑燕臺詩誰解知音似柳枝寂寞閑
庭春已過露花無語背人悲

其二

愛梅常恐着花遲日禱東風莫後期及得見
梅還冷淡東風全在一作長小桃枝

其三

茸茸小雨弄春晴已有狂花未見鶯便使一
年惆悵在曉窗寒夢別輕盈

其四

春衣初作舞雲歸
手展韋編晝寢稀
解使芳陰快
幽意飛紅零落
遶窓扉

其五

短帽輕衫信馬行
郊原春色太牽情
兔葵燕麥渾閑事
最有蕪菁到處生

其六

月圓新碾破春醪
賴有歸鴻寄好音
人在天涯莫迴首
恐輸華髮上瑤簪

其七

故人不見空凝睇
過鴈全踈只斷菟
猶有野梅臨水在
一枝無語伴黃昏

張祖同挽詞

西南失望郎天理
信茫茫豪逸陳驚座
風流馬季長才宜分竹
使恩不自椒房清白
今方著群兒勿謗傷

任太君挽詞

賢婦古亦少紛紛
何況今栢舟全美志
綵服

慰幽心舊邑虛湯沐新阡附藁礎子孫門
壯誰敢齒諸任

送太學李生歸鄉

挈笈來東序經年亦倦遊卻辭同舍去聊慰
倚門憂顏子進未止何蕃誰為留到家席不
煖隨計又皇州

送蘇教授赴闕

三年泮水振洙風俯接諸生屢改容嶺霧因
時難隱豹巖雲有便得從龍久欽才調無雙

手今喜聲名達九重拂袖漢陽休更問丈夫
事業出心曾

別閩中許秀才許歸闕

臨歧長嘆息此嘆意深微浮世年年別初心
事事違捫參蜀道遠犯斗海槎歸故園有餘
樂黃雞秋正肥

送朱元素歸養

事國日猶長歸寧計亦良泉烹純孝味菽啜
自然香失馬君何患臨河我獨傷從今千里

夢夜夜到江鄉

贈瀘倅丘明善二首

吳頭楚尾秀山川一分才華占得全和氣煖
數冬有日清風寒壓瘴無煙分麾共領南門
翰筆筆終歸北闕天寄語江易夷落道安排
春織待新篇

友人布文識
梅聖俞詩

可曾為客到江陽塞上蕭條斷旅腸歌動竹
枝終日楚笛吹梅弄數聲羌仰天太息輸衙
憤被賤驚呼不為狂校尉自能青白眼肯教

牛尾一般黃

調華陽尉

家世傳儒素平生學古文三年思故國一命
荷明君折節羞黃版歸休許白雲吟詩無廢
事薄俸不禁分

孟東野尉平陽滏于詩曹務盡
廢郡置假尉以代之分其半俸

天寧節口號

九曲昆渠換碧流挺生英主間千秋謳歌萬
國纔歸禹損益三年便繼周南畝暗侵山色
盡西僊展到海邊休不知誰是乘槎客為採

蟠桃薦冕旒

書新堂

疊茅重葺一堂新
設榻聊爲簿領身
落枕不知鶯樹晚
汚書常苦燕泥春
獄官何預青苗事
野意新一作便白葛巾
能向此間時得趣
何須分外拜車塵

自笑二絕

案頭故紙如撥山
三年祇有馬上閒
貴官眼高不解顏
緊推不去何其頑

平生所學盡虛談
爲吏文書百不諳
喚作參軍真漫浪
軍中底事更能參

除夕感懷

永漏侵春已數籌
地爐猶擁木綿裘
無心豈畏三屍訴
愛日還驚一歲休
故國二千空醉眼
新年三十恰平頭
光陰未用相敦迫
領取衰翁兩鬢秋

金牛驛二絕

秦人虛餌方投釣
蜀國癡魚已上鉤
天與中

原通窄馬人間何處有金牛
由來仁義行終穩到了權謀術易窮纔見詐
牛收劍外已聞真鹿走關中

春日郊外

城中未省有春光城外榆槐已半黃山好更
宜餘積雪水生看欲到垂楊鶯邊日煖如人
語草際風光作藥香疑此江頭有佳句為君
尋取却茫茫

嘉陵江上作

多士數車軛誰令汝去家坐禪腰已折持劍
手新義雖未能空寂然猶耻攫拏江流何處
去憑仗弔懷沙

自笑

已白窮經首仍丹許國心那能天補綻更欲
海填深兒餒嗔郎罷妻寒怨藁碓世間南北
路何用爾霑襟

率諸公飲開元寺勉翁有詩因次其

韻已上綿州作

三伏光陰過初秋宇宙新一杯相馬酒千古
竹林人坐上山入永嘉屐蟻浮彭澤巾悲歌
送落日爲我少停輪漢制學馬給相酒蓋薄酒也

直舍夜坐

強仕似幼學細書仍短檠月來吟處白風及
醉時清坐久露微濕更深秋有聲不知愁底
事終日自悲鳴

上張安撫

一劍縱橫敵萬夫少年功業負雄圖時平不

佩將軍印任重來分刺史符膝上細絃調雅
操塞前蠻柵長平蕪自慙子美詩才少難詠
花卿絕世無

春日

今日天涯又見春與春世契合相親君看四
十年來事只有東君是故人

任滿未聞除代

已媿千名佛何堪一卷師十年駒局促萬事
燕差池館下諸生笑門東稚子饑賓僚眼前

換歲月鬢邊馳子舍行將去吾車亦已脂謂
能魚縱壑猶作鳥粘糍宿有詩書債非關造
化兒岷峨吾故國自合去遲遲

次勉翁送客韻

仕宦方誇四十強江山那復戀蒼茫征鞍過
我橫春色別酒斟君醺野芳青史功名時執
手紅塵岐路一愁腸神雖可是截鋒物要使
兒曹看脫囊

唐先生集卷之七終

跋唐子西先生集後

唐子西名庚蜀之眉山人與二蘇相後先以詩
文鳴于宋而位不通顯子西嘗倅綿州州之山
水如雪峯院富樂山越王樓暨諸勝槩足跡所
至怡情寄興皆有題咏雋永清勁至今人稱誦
如內前行梅花芙蓉溪諸詩尤膾炙人口誦其
詩想其人能不興懷于數百載之上乎况予為
州人又寓形芙蓉溪側剩聞其遺風者乎子西
平生著述甚多歷世綿遠卷帙散失所存者特

千百中十一耳惜哉王德辛也予承乏南京刑
書偶獲抄本詩若干篇於主事高君第寶而讀
之不忍釋手夫表章先賢後人事也遂托金壇
尹任君佃鋟梓與學者共之其未獲者尚俟於
後之君子云第字公次今為南京吏部郎中佃
字相虞今為監察御史皆予同鄉人

嘉靖三年夏六月望日蓉溪居士金獻民跋於
兵部之運籌軒

唐子西先生集終

